



UKA2015/7-3

Tillie Martinussen

**2016-mut aningaasanut inatsisissatut siunnersuut.**

(Aningaasaqarnermut Aatsitassanullu Naalakkersuisoq)

(Pingajussaaneerinninneq)

Demokraatini perruualaarutigaarput aningaasanut inatsisiloratta aningaasaqarnikkut akisussaassuseqarlunilu inunnik isumaginninnikkut pitsaliuinissamut siunertalimmik kiaslu iluarsartuussinissanik siunertalimmik, innuttaasut sanngiinnersaanik angusassamik toraagaqarluni ikiuinissamut siunertalimmik taamatullu inuusuttut ajornartorsiortut ikiorneqarnissaannik piginnaasaasalu misissorneqarnissaannik siunertalimmik.

Kingulleq siilliukkaanni iluarisimaaqaarput, suliniut pissutaalluni suli amerlanerit ilinniagaqarsinnaangornissaannut suliniutit sakkortuumik ingerlaqqissammata, sualummik inuusuttut suliffissaaleqinerat nungutinniarlugu.

Tamatuma saniatigut nuannaarutigaarput, partiit aningaasanut inatsisissamut tunuliaqutaasut isumaqatigiissutigimmassuk meeqqat sumiginnarneqartarnerisa akiornera sakkortusiniarlugu soorlu "inuusaq atorlugu suliap" annertusineratigut, taanna sumiginnakkat iliuuseqarfingasuarneqartarnissaat pillugu suliamut ilaavoq, atornerluinerup akiornissaanut amerlanernik aningaasaliissuteqarpugut taava aamma kommunit ikiorserneqarnissaat qularnaarparput, ilaatigut akueralugu iluarsartuussinernut atatillugu sullissisut amerlissasut aamma immikkut aningaasaliissuteqarnissaq ammaanneqarpoq, siunnersuinissamut taamatullu iluarsartuussinernut inuusuttullu atugaat pillugit suleqatigiinnerup sakkortusinissaanut.

Aamma pisortat allaffisornerat annikillisarniarlugu suliap aallartinisalernera nuannaarutigaarput: Pisortat allaffisornerat annikinnerusariaqarpoq akikinnerullunilu. Nuannaarutigaarput annikillisaanissaq isumaqatigiissutigisarput aamma ukiuni aggersuni ingerlaqqittussaammat.

Neriuppugut ineriantorneq ingerlaqqikumaartoq aamma kajumissaataajumaartoq pitsangorsaanissamut soorlu Namminersorlutik Oqartussani sulisut immikkoortortaminni namminneq perusutartik piumassusertillu naapertorlugu allanngortiterisinnaalersillugit taamatullu sumi sipaartoqarsinnaanera, pitsangorsaasoqarsinnaanera allanngortiterisoqarsinnaaneralu pillugit politikerinut erseqqissaasarnertik nangillugu. Aningaasarsiornermut allaffisornermullu iluaqutaasussamik; neriuppugut uangut pisortani angujumaarlugu sulisut pikkorinnerusut ikinnerusullu aammali aqutsisut pikkorinnerit suleqataasut sulinermi avatangiisit pitsaasuunissaannut.



Aamma eqqaasitsissuteqalaarnissaq inissaqartariaqarpoq; manna aningaasanut inatsit pissutaalluni ajornartorsiornermut aningoqqajanngilarput. Suliassagut annertoorsuit suli siunitsinniippu. Aningaasarsiornikkut suli akisussaassuseqarluta ingerlaqqissaagut aamma akileraartarnikkut iluarsartuussinerit piviusunngortittariaqarpagut qularnaarlugulu inunnik isumaginninnerup iluani iluarsartuussinerit sunniuteqarnissaat.

Qaammarsaanerunissaq qularnaarinneqataaffigissavarput, innuttaasunut attaveqarnerput pitsangngorsassavarput, Namminersorlutik Oqartussat iluanni sullissineq paasiuminarnerusariaqarpoq - immikkoortortaq sunagaluarpualluunniit aamma pisariaqarfii ni isertitsissutaasinaasunik ineriartortitseqataasariaqarpugut.

Aningaasarsiornikkut suliassat imaannaanngitsut siunitsinniippu.

Isertitatigut siuariartullatsisarneq malugisimasarput pissuteqarneruvoq raajat qaleruallillu akigissaarnerannik aamma sanaartortitsinermi sanarfinermilu akit nalimmassarneqarnerannik. Maannakkulli inisisimanitta attatiinnarnissaa periarfissaangilaq.

Kikkulli tamarmik ilisimassavaat Demokraatit piareersimammata akisussaaqataanissaminnut. Aningaasartuutinik amerliartuinnartunik pilersitsillatalu aserfallattaasinnaanngilagut peqataanillu innuttaasut neriorsorlugit kiffartuussineq pitsaanerulerumaartoq uffa akissaqartinnagu. Tassa imaappoq siunissami tungiuneq maannakkut tungiuinermik siunissamilu aningaasarsiornikkut inisisimalerumaarnissatsinnit ulorianartorsiortinnejqarpoq.

Suliffissaaleqisut suli amerlavallaaruujussuarput aamma Aningaasarsiorneq pillugu Isumalioqatigiisitat nalunaarutiminni eqqaasaattut, suliffissaaleqinerujussuarmut pissutaapput ajornartorsiutit aaqqissuussinerup ataaniittut allallu pissutsit. Aamma pissutaaqataapput naammattunik piginnaasaqannginneq, nunap immikkoortuini pissutsit sulinerullu pilerinassusaa uangullu soleqataarusuppugut aaqqissuussinerit pitsaasut sulilernissamullu ikorsiissutit tigussaasut pilersinnissaannut.

Piginnaasat qaffassarsinnaagutsigit suliffissaaleqisut sulileriaannaat sanaartornerup sanarfinerullu iluini sulilersillugit, taava nunami qaffassaanissaq pisariaqartoq pissagaluarpoq, taava nukiit atussagaluarpagut iluarsaassinernut, pitsangngorsaanernut ineriartortitsinernullu, pilersitsinissarput imaluunniit suliffiit pioreersut ineriartorteqqittariaqassavagut.

Piujuartitsinissamut ineriartortitsinissamullu pilersaarut neriorsuutaareersoq assut qilanaaraarput.

Aamma nuannaarutigaarput takornariartitsinermut tunngatillugu ineriartortitsinissamut atukkat pitsaanerusut qularnaarneqarmata. Qilanaarpugut suliami Kalaallit Nunaannut pingaruteqartumi inernerit takunissaannut. Inuussutissarsiatip pisatta ineriartortinnissaa qularnaarnissaalu pingartilluinnakkatsinnut ilaavoq aammali immikkoortumi tassani suliassat allat qularnaartariaqarpagut piaartumik inuussutissarsiat sukkasuumik imminut napatissinnaaleqqullugu.



Naggataatigut nuannaarutigaarput nunani allani ilinniartut atugaat pitsangortiallakkatsigit Avalammut aningasaliissutit amerlinerisigut. Suliarli naammassinngilaq annerusumik eqkartariaqarparput qanoq iliorluta ilinniartut angerlaqqinnissaannut kujuminnerulersissinnaanerlugit taavalu aamma meeqqat atuarneranni piaartumik qularnaartariaqarparput atuartut minnerpaamik marluinnik oqaaseqalernissaat ajornanngippat pingasunik. Taamaaliorutta qularnaassavarput, meeqqat inuusuttullu ilinniarnissaminntu pitsaanerpaanik periarfissaqalernissaat.

Aamma inuit ataasiakkaat atugarissaartut ilaqtariillu atugarissaartut aamma puigorneqassanngillat taakkummata nunami maani siuttusut, suliffissanik qularnaarinnittut, nuannaartunartuusullu tamaattumik nersualaartariaqarput. Sumiluunniit tamarluinnassi atorfissaqartinneqarpusi.

Aamma nuannaarutigaarput akissarsianut akileraarutit allanngorallartussajunnaartikkatsigit, neriuupugut innuttaasut taamasillutik amerlanerusunik kaasarfimmioqalernissaat qularnaarneqarsimassasoq.

Taamatut oqaaseqarluta Demokraatini partiit qutsavigerusuppagut suleqatigiilluarsimaneq pillugu inassutigalugulu Aningasanut Inatsisissaq akuerineqassasoq.